



Cun funs ed emoziuns

AUGUSTIN BEELI/FMR

Quater chors, dus dil Grischun e dus dil Vorarlberg, ein s'entupai. Vendergis ei stau a Glion in eveniment musical extraordinari. La scuntrada culturala seresulta dils contacts amicabels denter las uniuns tetgalas dils chors d'omisduas regiuns.

Malgrad diversas collisiuns da termins a Glion cun occurrenzas il medem mument: «Igl e stau bellezza e fetg commuentont», han ils visitaders dil concert confirmau. Vendergis sera ein quater chors sepresentai ella baselgia claustrala dallas soras **dominicanas** da Glion. Ils aspectaturs indigens ein buca cumpari schi numerosamein sco usitau ad in concert en quei liug. La sentupada han cantaduras e cantadurs dils quater chors culla dirigenta ed ils dirigents gudiu. *Clau Scherrer* (Cantus Firmus), *Thomas Gropper* (Kammerchor Cuera), *Willemien Langenkamp* (singing-friends) ed *Axel Girardelli* (Singgemeinschaft Hard) han presentau in program variont cun ovras classicas e modernas, romanticas, contemporanas, nordicas e latinas.

Duas premaudiziuns

Ils dus chors grischuns ed ils dus chors dil Vorarlberg han cantau quater ni tschun tocs vocals. «Richte mich, Gott» da Felix Mendelssohn, «La Patria» da Giusep Maissen, «Kaikki maat, te riemuitkaatte» da Mia Makaroff, e «O sacrum convivium» da Gion Antoni Derungs ed il Kyrie ed il Gloria ord la messa en es da Joseph Rheinberger ein singuls exempels ord il program. Ils dus chors vischins dil Grischun han presentau era duas premaudiziuns. Ina da quella «Kerzen wollen wir sein» da *Thomas Thurnher*, l'autra in «Agnus Dei» ord la messa brevis tonalis dad *Ivan Karpati*.

Era la presidenta dall'Uniun cantunala da cant dil Grischun, *Lucretia Bärtsch*, ha priu part alla scuntrada. Alla FMR ha ella

commentau suandontamein la scuntrada a Glion: «Mei ha quei concert commuentau fetg. Ton la diversitad ed il contrast dils quater chors, il quitau e gl'engaschi personal da tuts participonts d'interpretar las canzuns han contribuì ad ina atmosfera amicabile e pacifica en quei liug sacral.» Sco ella ha confirmau, ein ils



Ils chors durant l'interpretaziun d'ina dallas canzuns comunablas.

FOTO MAD

contacts denter ils chors grischuns ed dil Vorarlberg sesviluppai tras la schinumada «Chorweihnacht» dalla Cuminonza da la-vur dallas associaziuns da chors dallas Alps (AGACH). Actualmeins fan 16 uniuns tetgalas da chors dallas regiuns alpinas part da quella. La cuminonza internaziunala han ins fundau 1979 a Bozen el Tiroi dil Sid. Ella organisescha regularmeins simosis e scuntradas. «La proxima sentupada dalla musica vocala ei ils 2024 el Grischun. Lu ei la «Chorweihnacht» a Cuera, culs concerts d'advent da mingamai in chor digl Oberösterreich, Principadi da Liechtenstein, Steiermark, Vorarlberg e da nies cantun», la presidenta dall'Uniun cantunala da cant dil Grischun.

Ina dallas canzuns ch'ils quater chors han cantau da cuminonza ei «La sera sper il lag» da *Gion Balzer Casanova*. Il cumponist da Laax ei staus egl auditori ed ha astgau guder l'interpretaziun fetg fina. Il medem concert sco il vendergis a Glion ei staus la sonda a Lauterach sper Bregenz. La gronda baselgia da St. Georg ei stada stignada pleina, probabel perquei ch'igl ei ella regiun da derivonza dalla Singgemeinschaft Hard cun sias 60 cantaduras e cantadurs.